

工部則例



工部則例

營繕清吏司

城垣

一

京城規制。

內城周四十里。南面廣二千二百九十五丈九尺三寸。北二千二百三十二丈四尺五寸。東長千有七百八十六丈九尺三寸。西千有五百六十四丈五尺二寸。下石上甃。共高三丈五尺五寸。堞高五尺八寸。趾厚六丈二尺。頂寬五丈。設門



九門樓如之。角樓四。城堞百七十有二。旗礮房九。列戍八十四屯。儲火藥屋九十六所。雉堞萬一千三十有八。礮牕二千一百有八。凡門樓均朱楹丹壁。檐三層。封檐列脊。均綠琉璃。城闔九。惟正陽門城闔關三門。譙樓如之。餘八門城闔各一門。譙樓各二。凡譙樓角樓均四面甃垣。設礮牕。雉堞均留槍竇。

外城環內城南一面。計二十八里。南面廣二千四百五十四丈四尺七寸。東長千有八十五丈一尺。西千有九十三丈二尺。下石上甃。共高二丈。

堞高四尺。趾厚二丈。頂寬丈四尺。設七門。門各有樓。城闔七。角樓四。城堞六十有三。列戍四十三屯。儲火藥房七所。雉堞九千四百八十有七。礮牕八十有八。凡東西便門樓及角樓制如內城譙樓。設礮牕。雉堞均留槍竇。

內城城濠發源玉泉山。經高梁橋。至城西北。分二支。一循城北轉東折而南。一循城西轉南折而東。環遠九門。經九牖。匯流至大通橋而東。悉砌甃石於兩岸。地形高下不同。濠之淺深因之。正陽門外石梁三。餘八門各跨一梁。外城濠河亦

自玉泉山分流。至西角樓。逸城南流。折而東。至東角樓。環逸七門。東達運河。門外各跨橋梁一。一守禦器械。內城正陽門。信礮五。大礮十。礮車十。火藥一甕。號杆。龍旗。號燈。各五。橐鞬二十。弓二十。矢四百。架二座。鳥槍。長槍。各二十。架二座。餘八門如之。雲牌各一。崇文門。東直門。鐘各一。無雲牌。正陽門。鎖鑰四。紅杖四十。餘八門半之。正陽。崇文。宣武。朝陽。四門。擠桶各一。正陽。朝陽。阜成。西直。安定。五門。各貯墊板十六塊。崇文等八門。共分貯舊礮千八百二十有七。○外城。永

定門。鎖鑰二。雲牌一。橐鞬十。弓十。矢二百。長槍十。銅礮五。礮車五。火藥二千斤。餘六門。均如之。永定門。烘藥二十九斤。右安門。十有四斤。餘五門。各貯二十八斤。各有奇。西便門。紅杖二十。廣寧門。紅杖十。餘各四十。

一修繕京城。崇德年定。城垣。房屋。衙門。工完。令部臣察驗堅否。工作不堪者。即令原管工官修理。如果堅固。仍定限三年內塌壞者。責令賠修。○順治十七年題準。由部委官。不時巡視內外。牆垣。凡有損壞。即行修葺。○康熙五年題準。內

城下護城河岸。遇有水衝處。由部委官修築。外城河岸。順天府及五城官修築。○又題準。京城上遇有窪漏之處。步軍統領。即會同部委官。察驗修補。堆築堅緻。俾水道流通。無致浸齧。○二十八年題準。外羅城東便門起至西便門止。水關倒塌之處。本部侍郎會同府尹監修。○三十九年議準。嗣後八旗城上火藥房。遇有傾圮。由部會同步軍統領。察驗覈算奏聞。令步軍營官兵修理。其餘由部修理。○雍正八年覆準。內外城牆除土心之外。舊趾寬五六尺。頂寬三四五

尺不等。今議以趾寬六尺。頂寬四尺。著為定例。城頂海墁。堅築灰土。鋪墊平坦。毋使積水。再向來城垣。俟有坍塌。始行修葺。不惟城甃破損。而牽連坍塌者必多。嗣後著步軍統領。會同本部。各委官一人。不時巡視。於雨水之前。修葺堅固。一年任滿。委官更替。一外省城垣。順治十一年

諭。各省城垣傾圮。橋梁毀壞。地方官能設法修葺。不致累民者。該督撫具題叙錄。欽此。○十五年覆準。各官捐修城垣。務將丈尺。及用過工料。逐一詳勘。方

準具題。如借端科歛累民。即行指叅。○又題準。修完邊牆。五十丈至百丈者。紀錄一次。○十六年覆準。禁止有司。罰百姓修築城樓。堞口。○康熙元年題準。捐修城垣。務照舊式堅築。取結報部。如不合舊式。并三年內塌壞者。管工官役。該督撫指名叅處。○三年定。凡捐修城垣。譙樓。城堞。房屋等項。督撫親身察驗保題。若三年內損壞者。監工官及該督撫。均降級賠修。○四年諭。捐修城垣。令附近道官驗看。取具堅固印結。督撫具題議叙。欽此。○七年議準。停止見任官捐修城垣事。

例。○十五年題準。城池不豫先修理。以致傾圮者。罰俸六月。○二十四年題準。各省倒壞城垣。令督撫稽察。速行修築堅固。彙數報部。如仍漫不修理。將該督撫交部議處。○三十三年覆準。提鎮及專城副將叅遊。每年量捐工食。給與步戰守兵。修理邊牆。至二百丈者。紀錄一次。八百丈者。加一級。多者照數遞加。各將弁量捐銀數。修理丈尺。每年造冊具報。兵部察覈具題。照例議叙。○三十四年議準。修築邊牆。每兵日給銀四分。邊汛武官。捐銀至六百兩者。準隨帶加一

級。三百兩者不隨帶加一級。百兩者紀錄一次。
○五十五年覆準。修築邊牆議叙之處。著永行
停止。如有傾圮。令各鎮同地方官。及時修補。○
雍正五年議準。行令直省督撫。察所屬各處城
垣。如此小坍塌。令地方官。及時修補。如漫不經
心。以致坍塌過多。即行叅奏。其原冊已多者。地
方官量行捐修。工完。詳報委勘。工程堅固。量予
議叙。如興工未竣。遇有升遷。事故。將所修城垣
造入交盤冊內。移交接任官續修。工完。分別新
舊。造冊報部。倘地方官因循怠忽。或未修捏報。

并借修城名色。科歛民間者。督撫題叅治罪。○
七年定。外省新修城垣。地方官遇有升轉離任。
將有無坍塌之處。交代與接任官。交代不明。致
有坍塌。仍著前任官修補。○八年覆準。晉省坍
塌邊牆。該地方文武各官。不時修築。果能堅固
如式。百丈以上者。該撫提勘確。年底題請議叙。
準予紀錄一次。多者以次計算。不及百丈者。該
撫提酌量獎勵。倘捏報修築。照妄冒軍功例治
罪。○乾隆元年覆準。各處城垣。遇有这些小坍塌。
令地方官。於農隙時修補。如有任其坍塌者。即

行參奏。其坍塌已多。需費浩繁者。該督撫分別
緩急報部。有必應急修者。一并妥議具題。○二
年

諭。今年春夏之交。直隸山東。雨澤愆期。二麥歉收。雖
屢降諭旨。蠲振平糶。恐閭閻尚有艱食之虞。著巡
撫悉心計議。開渠築隄。修葺城垣等事。酌量舉行。
使貧民傭工就食。兼贍家口。庶免流離。再年歲豐
歉難定。而工程之修理者。必先有成局。然後可以
隨時興舉。一省之中。工程之最大者。莫如城郭。而
地方以何處為最要。又以何處為當先。應令各督

撫確察。分別緩急。豫為估計。造冊報部。將來如有
水旱。欲以工代賑。即可按籍速為辦理。於民生殊
有裨益。欽此。○九年奏準。州縣城垣。雖年久難免
損壞。亦由於地方有司。未能隨時修葺。以致日
益傾圮。有曾經題咨。估需工料。僅數百金。至千
餘金者。嗣又陸續坍塌。估至一二萬金不等。是
前估未修。續塌又至。胡所底止。應就見在坍塌
之處。報有段落丈尺。及已經勘估。報有工料銀
數者為準。造冊。由府州覈明。詳撫存案。飭令加
謹防範。嗣後凡有續塌處所。除猝遇暴雨水衝壞

以及積雨淋坍。實在工程浩大者。據實詳明。委該管府州親詣確勘。出結造冊。咨部存案。俟歉歲以工代賑外。其餘些小坍塌。均責令州縣於農隙時。酌撥本地就近民夫。徐為修補。不得濫請動項。亦不許請留代賑。致滋推諉。仍責令該管府州。於每年盤察所屬時。攜帶原估冊籍。親加勘驗。果無未經補修之工程。即加結備考。倘有續坍未經修整。即酌定限期。勒令修理完固。如延玩不修。該府州即以玩視城工詳叅。倘通同徇隱。即令該府州分認賠修。至見在已坍者。

亦應分別工料多寡。次第修舉。州縣原設有存公銀。地方公事。孰大於城垣。即以此項購料興築。並非捐墊。其估需千金者。除土方小工。酌用民力外。所需料價。均令各州縣。即在額設存公項下動用。按年分修完固。如遇升遷離任。著接署之官。驗明工段。設有短少。詳令修足。通同徇隱。著落署官賠修。○十三年覆準。令各省督撫。將所屬城垣。周若干里。高厚若干丈尺。並見在坍塌。長寬厚各若干。逐一造冊報明。以備稽察。其或別有此小坍塌之處。責令地方官。及時修

補。倘玩視不修。致今日漸傾圮。即著賠修。仍照例參處。如遇新舊交代。著新任官照冊察明。令前任官賠修。倘徇隱不報。新任官賠修。○又議準。陝省邊牆。在河套內者二千里。在河西者三千里。套內之地。沙浮無土而輕颺。牆當浮沙之上。坍塌者多。河西之沙。兼土而實。坍塌者少。套內舊建十有二堡。見在居人八百十有九砦。七十八小墩。十有五大墩。尚有堅完可觀者。其牆雖傳浮沙。亦可為中外之限。一切甃石。自不應聽其倒塌。為閒人取去。若河西之牆。則尤不可

使之漸壞。令陝西督撫。將見在邊牆。飭令該管官弁。加意保護。其有坍塌甃石。收貯備用。毋許聽人竊取。如漫不經心。即將該管官弁。照例指叅。凡有邊牆各省。均照此例辦理。

一城垣禁令。順治二年定。內外城樓。及城上堆鋪。不許閒人登視。違者交部治罪。○十七年題準。內外城垣。凡有頑民竊甃盜賣者。送刑部依律治罪。○雍正八年奏準。令步軍統領。嚴飭該管營弁。不許附近居民。於城根取土。○乾隆九年

諭各省城垣。自應加謹防範。以資保障。其殘闕處所。修理雖有緩急。若地方官果能隨時補葺。自不至介然成路。豈可縱容民人登陟。不為察禁整理。朕從前經過地方。見有殘闕之處。聽民人踰越。漸成路徑者。令各省督撫。董率有司。留心整飭。毋得仍前玩視。欽此。

鐘鼓樓附

鼓樓在

皇城地安門北。趾高一丈二尺。廣十有六丈七尺。有奇。深減三之一。四面有階。上建樓五間。重檐。

前後券門六。左右券門二。磴道門一。繞以圍廊。甃垣周匝。○鐘樓在鼓樓北。制相埒。建樓三間。柱稅棖題。悉制以石。舊制用木。乾隆十年。改建以石。十二年告成。

